

Gij Youqgaenj Laebdaeb Guh

坚持的重要

“Gayouuz! Gayouuz!” Bouxgyauqlieh youq henz gikdoengh dwk bang gou gyayouz. Ha, cibbet miux bet! Gou angq dwk youq ndaw raemx diuq hwnjdaej—— cungjsuenq mauhgvaq gij giluz samcib mij swyouzyungj swhegeij lo!


Geiq ndaej mwh iq gou ciengzseiz baenz bingh, daxmeh couh hawj gou bae hag youzraemx. Mwh baez daih’ it raen aen daemz youzraemx, gou geizheih dangqmaz, bouxgyauqlieh dak gou youq ndaw raemx lienh youzraemx. Ginggvaq hag duenh seizgan ndeu, gou gaemdawz gij dungcoz ceiq gihbwnj youzraemx haenx lo.

Hag rox gihbwnj dungcoz le, gou bungq daengz nanzdaez lo—— mbaetheiq. Mwngz rox lwi, danghnaeuz mbouj rox mbaetheiq, couh mbouj ndaej youq ndaw raemx youzraemx seizgan nanz, danghnaeuz mbouj siujsim doek roengz giz raemx laeg bae, lienz gij gihvei iet fwngz hemq gouqmingh cungj mbouj miz.

Bouxgyauqlieh naihsim sonyinx gou: Fwngz rex haenz daemzraemx, mbaet gaeuq heiq, dawz gyaeuj ndaem roengz raemx bae, caiq iet din fwngz, hawj daengx aen ndang fouz youq najraemx. Hoeng

gangj ndaej yungzheih guh hwnjdaej dwgrengz ha! Gou gig lau, cungj mbouj haengj lienh. bouxgyauqlieh yawj ok gij simsaeh gou, unqswnh doiq gou naeuz: “Mboujmiz couh mbouj hag, yaek hag couh itdingh yaek hag rox, bungq daengz di hojnanz ndeu couh lau, yienghneix mwngz baezlaeng bungq daengz hojnanz engq hung, mwngz baenzlawz guh ne?” Bouxgyauqlieh dingz yaep ndeu, song fwngz gaem aen mbaq gou, naeuz: “Gou siengsaenq, cijaeu mwngz miz mbei miz saenqsim laebdaeb guh roengzbae, yienghneix, mboujlwnh geijlai dwgrengz, cungj nanz mbouj ndaej mwngz!” Gou yawj lwgda bouxgyauqlieh gujli gou haenx, ngaekngaek gyaeuj. Doeklaeng, gou mbeihung dawz gyaeuj ndaem roengz raemx bae. Mwh ndaem roengz raemx, gou roxnyinh seiqhenz miz raemx at aen rwz gou in dangqmaz, gou youq ndawsim siengj: Dingj youq! Dingj youq! Laebdaeb dingj roengzbae couh hingz! Mbat ndeu, song mbat, sam mbat…… Gou rox ndaem raemx lo, seizneix gou ndaej youq ndaw raemx mbaetheiq seiqcib miux lo!

Doeklaeng, youq mwh hag youzraemx, gou lij bungq daengz haujlai hojnanz, gou cungj baenz



yiengh baenz yiengh haekfug gij hojnanz neix.

Youzraemx yiengh yindung neix, daengz seizneix gou gaenq laebdaeb youz roek bi lo. De mboujdan ndaej hawj gou ndang cangq, lij hawj gou rox gij youqgaenj “itcig cungj guh mbouj cuengqsoeng.”

(Gyanghsuh Suhcouh Si Swhsanh Sizyen
Yozyau Fu Swjyenh)



Hawj Swhegeij Miz Saenqsim

给自己信心

Ngoenzneix banringz, yijvwnz lauxsae naeuz yaek senj boux cujcangj ngoenzgeiq ndeu, yaek fucwz soufat ngoenzgeiq.

Cij miz aen mingzngeg ndeu, gou mbouj ndaej saetbae bw. Gou laeglemx naemj. Hoeng yawjyawj seiqhenz, mbouj miz saek boux doengzhag yaengx fwngz, ndaw gyausiz dinghsuhsu.

Saeklaeuq gou guh mbouj ndei baenzlawz guh? Gou ngamq siengj yaengx fwngz, ndawsim fwt siengj daengz gijneix. Mbouj lau law, cij dwg sousou ngoenzgeiq, caiq soengq daengz bangunghsiz lauxsae bae, saeh baenzneix genjdanh, gou baenzlawz guh mbouj ndei ne? Gou gag gujli swhegeij.

Caiq yaemhywx bouxwnq

couh ciengj bae lo, gangj daengz daej bae cij miz aen mingzngeg ndeu ha. Hoeng danghnaeuz gou dang cujcangj le guh mbouj ndei, deng lauxsae mienx cujcangj gou bae, gou mbouj couh vutnaj luha? Ndawsim gou gig mauzdun.

Mbouj dwg soufat ngoenzgeiq ndwi ha? Gou mbouj yaemhywx lo, byotbyat yaengx fwngz hwnj.

Lauxsae yawjyawj gou, angq dwk riu lo: “Caen ndei! Couh dwg Vangz Lingzyaj lo!” Mwhde, ndawsim gou angq dangqmaz. Gou roengz gietsim, itdingh guh ndei bouxbangfwngz iq lauxsae!

(Hoznanz Dangzhoz Yenz
Bizden Cin Daih’it Siujyoz
Vangz Lingzyaj)

Caiq Sawq Baez Ndeu

再试一次

Miz dah niq ndeu, ndaw ranz gungzhoj. Miz baez ndeu, dahniq caeuq daxmeh bae haw, de yawjraen haujlai vunz humx aen dan gai duhngaz ndeu, couh cam daxmeh: “Vihmaz dan duhngaz neix gai ndaej baenzneix ndei?” Daxmeh naeuz: “Aenvih daengx aen hawciengz cij miz dan neix gai duhngaz!” Dahniq sawqmwh siengj daengz, cam daxmeh: “Yienghneix raeuz ndaej ndaem duhngaz gai lwi?”

Dingzlai bohmei dingqnyl lwgnyez baenzneix cam, aiq dwg yienghneix gangj: “Ndaem maz duhngaz? Ndeindei doegsaw, gaej doeng siengj sae siengj.” Roxnaeuz naeuz: “Ndaw ranz mbouj miz dieg ndaem duhngaz, raeuz hix mbouj rox ndaem.”

Hoeng, daxmeh dahniq cij han coenz vah genjdanh ndeu: “W, raeuz sawqsawq.” Yienghneix, mehlwg youq yangzdaiz ranz de ndaem duhngaz lo. Hoeng duhngaz maj okdaej mbouj geij nanz couh rozdai lo, dahniq siengsim dwk daej lo. Daxmeh nai naeuz: “Raeuz caiq sawqsawq.”

Mehlwg neix ra daej bonj saw gaisau baenzlawz ndaem duhngaz ndeu. Ciuq gwnz saw sij haenx, daxmeh youq

yangzdaiz cang aen yiemz dangj rongh ndeu. Dahniq cam: “Baezneix raeuz ndaem baenz lwi?” Daxmeh han lumj baezgonq nei: “Raeuz sawqsawq.” Hojsik, baez daihngaih hix ndaem saetbaih lo.

Doiq gij saetbaih neix, gyoengqde senj laebdaeb sawq ndaem. Daxmeh fatyienh, gij yienzaen duhngaz rozdai dwg mbouj anqseiz rwed raemx. Hoeng daxmeh yaek bae guhhong, dahniq hix yaek baehag, mbouj miz banhfap anqseiz rwed raemx. Mehlwg song boux siengj ok aen banhfap ndeu, youq aen bingz suliu mbouj yungh haenx mbongq haujlai cong h iq, ndaw bingz coux rim raemx, venj youq gwnz duhngaz, yienghneix ndaej lienzdaemh rwed raemx hawj duhngaz lo. Mwh cang aen bingzsuliu, dahniq cam daxmeh: “Baezneix ndaem ndaej baenz lwi?” Daxmeh gig miz saenqsim riu naeuz: “Raeuz sawqsawq ba.”

Duhngaz cungjsuenq ndaem okdaej lo, dahniq angq lai lo. Daxmeh yawj dahniq baenzneix angq, cam naeuz: “Raeuz dwg mbouj dwg sawq ndaem gij wng?” Dahniq riu naeuz: “Raeuz sawqsawq!” (Lij Gyah)

